


The image shows the front cover of an old book. The cover is decorated with a complex marbled pattern, primarily in shades of grey and black, with intricate veins of red and white. The texture appears aged and slightly worn. At the top center, there is a rectangular label with a decorative border. The label contains the text 'EX LIBRIS' in a smaller font, followed by 'L. DUSSIEUX' in a larger, bold font.

EX LIBRIS
L. DUSSIEUX









DOVBLE DE

LA RESPONSE

DE LA

ROYNE REGENTE,

MERE DV ROY,

A la Lettre escritte à sa Majesté,
par Monseigneur le Prince de
CONDE', le 19. de Feurier

1614.

LA RESPOINSE
DOVRE DE

ROYAL & ROYALTE

39
326

La Lettre de l'Ordre de l'Épée
du 10. de l'Ordre de l'Épée
du 10. de l'Ordre de l'Épée
du 10. de l'Ordre de l'Épée

1614

Double de la response de la Roynne Regente, me-
re du Roy, a la lettre escriite a sa Majesté,
par Monseigneur le Prince de Conde, le
19. de Fevrier 1614.

M O N Nepueu, Vostre lettre escriite
à Maisieres, le 19. de ce mois, m'a
esté presentee le 21. Elle contient
plusieurs chefs, ausquels ie voulois
attendre à respondre particulièrement, lors que
les Estats generaux du Royaume seroyent as-
semblez, puis que le Roy, Monsieur mon fils
& moy auions ia arresté, par l'aduis des Princes
& officiers de la Couronne, & autres princi-
paux Conseillers du Roy, mondit sieur, & Fils,
qui sont aupres de nous, d'en faire la conuoca-
tion, dont nous auions doané aduis par les Pro-
uinces deuant la réception de vostre dite lettre,
comme vous eussiez appris de mon Cousin le
Duc de Ventadour, & du sieur de Boissize, que
i'auois depeschez vers vous, si vous ne fussiez
party de vostre maison de Chast. auxoux, pour
passer en Champagne, comme vous auez fait,
(sans nous en donner aduis) au mesme temps
qu'ils s'acheminoyent à vous. Ou si depuis vous
leur eussiez mandé approuuer qu'ils fussent al-
lez ou vous estes, comme ils s'y sont offeris par
leurs lettres, qui vous ont esté portées par hom-

me exprès. l'ay eu à plaisir de cognoistre, par la lecture de vostre dite lettre, que vous approuuez ladite assemblée: Car c'est vn bon remede pour pourueoir aux desordres que vous dites auoir cours dedans le Royaume. C'est aussi ce luy qui a tousiours esté plus estimé, & désiré de moy, & duquel ie faisois bien estat d'vser à l'entrée de la majorité du Roy, mondit sieur, & fils, pour luy représenter en vne si notable compagnie, le passé de ma regence, L'informer du present, & mieux reigler toutes choses pour l'aduenir, que ie n'ay peu faire, à mon grand regret, durant mon administration. Mais comme depuis vous auez enuoyé vne copie de ladite lettre à Messieurs de la Cour de Parlement de ceste ville, l'ay creu que vous la diuulgueriez encores par toutes les autres compagnies, & Provinces du Royaume, pour en mesme temps, descrire par tout, comme il semble que vous pretendez faire icy, la direction & conduicte des affaires publiques aupres de moy, à mon desauantage: car les plainctes que vous faites, des desordres que vous attribuez à ceux qui seruent le Roy aupres de moy, s'adressent plus à moy qu'à eux: C'est vn artifice dont l'on vse à poste, pour donner aux subiects du Roy vne mauuaise odeur, & impression de mes actions. C'est pourquoy i'ay bien voulu, en attendant la tenue desdits Estats generaux, que i'aduanceray tant que ie pourray vous faire scauoir, par aduance, ce qui est contenu en la presente. Je commenceray doncques par vous dire, mon

5

Nepueu, que vous, & toute la France, estes obligez, quoy que vous puissiez dire, & publier au contraire, de recognoistre & confesser que le Royaume à par la singuliere grace de Dieu, & l'assistance que j'ay receue des gés de bien, iouï en ma Regence, contre l'opinion commune d'un repos general & plus entier, que nous n'eussions osé esperer, apres auoir perdu le feu Roy, mon Seigneur, que Dieu absolu (la seule presence duquel contenoit toutes sortes de personnes en deuoir & obeysance) dont ie ne puis louer assez la bonté & prouidence diuine, & les bons François, de toutes qualitez, qui ont en cela fidellement seruy le Roy, mondit sieur, & fils, au grand besoin que j'en ay eu: Car chacun a sceu & veu qu'elles ont esté mes peines, mes combats, & mes continuelz travaux, pour maintenir la tranquillité publique, qui est encores maintenant enuiee, & trop rudement, & ouuertement assaillie par ceux qui deuroient le faire: Ils ont commencé dès le Sacre du Roy, mondit sieur & fils, ont depuis continué, comme ils font encores, par l'ordre & direction d'un mesme Conseil: J'aduoue librement auoir quelquesfois eu recours à des moyens peu conuenables à la dignité du Roy, mondit sieur, & fils, pour contenir & retenir en deuoir les auteurs de telles trauerses: Mais ie l'ay fait pour euitier pis. Ce qui a esté souuent aussi mal recogneu, qu'il est à present mal interpreté par ceux mesmes qui en ont profité. C'est la cause principale des despences que vous nommez à present pro-

digalitez, que la necessité du Royaume a ex-
 torquées de moy, contre ma propre volonté,
 & qui n'eussent eu lieu, si vous m'eussiez aussi
 assiduellement fortifiée de vostre assistance, que
 ie l'ay desirée, & vous ay donné occasion de fai-
 re, par l'entiere & honorable part que vous a-
 uez toujours eue en la conduite des affaires,
 par preference à toutes autres, comme il est
 deub à vostre qualité: Mais ie ne puis que ie ne
 me plaigne à vous, de quoy vous avez laissé cou-
 ler, & passer quatre années de ma Regence, sans
 m'auoir aduertie des maluersations sur lesquel-
 les vous fondez vostre mescontentement. Car
 si vous me les eussiez descouuertes, i'y eusse ap-
 porté l'ordre nécessaire pour le bien du Royau-
 me, auquel vous avez notable interest: Telle-
 ment qu'il semble que l'on ayt voulu exprès fai-
 re vn amas de telles plaintes, (qui sont toutes-
 fois autat imaginaires que peu véritables,) pour
 donner prétexte aux factions & mouuemens
 qui menacent le Royaume de desolation, ou de
 dissipation, au lieu d'vne reformation que vous
 dites rechercher. A quoy ie voy, avec desplaisir
 que l'on vous engage contre vostre volonté: car
 vous avez vn interest si remarquable, de con-
 seruer ceste Couronne entiere, & en felicité,
 que ie ne veux point douter que vostre inten-
 tion ne tende à toute autre chose: Mais pour y
 paruenir plus honorablement, & vtilement,
 vous ne deuez vous esloigner de moy, n'y com-
 mencer par former vne société qui en engen-
 drea d'autres. Car toutes diuisions, & partia-

litez en vn Royaume sont de tres-dangereuse
consequence: Tant s'en fait que i'en aye ap-
prouuè vne seule, que ie les ay toutes derestées,
principalement si tost que ie me suis apperceuè
que l'on vouloit s'en seruir, plus pour aduanta-
ger les partichiers, que pour bien faire au ser-
uice du Roy: Au contraire, i'ay tousiours desi-
ré, comme ie fais encores, de moyenner, de
tout mon pouuoir, vne bonne intelligence en-
tre tous les Princes, Officiers de la Couronne,
& les autres Seigneurs du Royaume. Mais i'y
ay tousiours esté trauersee, & empelchee par
les mesmes inuentions, & artifices de ceux qui
somentent encores à present celle qui se pre-
sente, Et toutesfois ils osent encores imputer
aux Conseils que i'ay suiuis, les factions que ie
condemne, dequoy i'ay souuent faict plainte à
ceux que i'ay estimez y pouoir apporter quel-
que remede: Si i'ay commandé l'observation
exacte des Edicts faicts par le feu Roy, pour
asseurer la paix du Royaume, ainsi que i'ay sou-
uent faict, & reiteré, avec grand soing, affe-
ction, & sincerité, L'on a publié que ie faisois
tels commandemens si precis, exprés pour
mieux surprendre ceux de la Religion preten-
dûe reformée, qui s'y endormiroient, Et s'est
on seruy, pour les ombrager d'auantage, des al-
liances que nous auons traictées du costé d'Es-
pagne, comme si elles estoient basties exprés
contre eux, & leur a-on aussi celé, ou des-
guisé à mesme fin, celle que nous traictons à
present en Angleterre, par vostre aduis, de la-

8
quelle mon Cousin le Duc de Bouillon a esté le principal entremetteur, D'ailleurs, si quelques fois i'ay vsé d'indulgence à l'endroit d'aucuns de ladite Religion, après auoir commis quelque exeez contre la iustice, la raison, & lesdits Edicts, ils ont blasmé ma tolerance, & patience, l'ont descriée, & interpretée à mauuaise fin, Et toutesfois il est certain, si vous auez esté auprès de moy, quant tels accidens sont arriuez n'auoir en tels cas, n'y autres qui ont concerné le public, rien ordonné à vostre desceu. Telles personnes eussent peut estre desiré que i'eusse vsé de plus grande seuerité en telles rencontres, tant par vengeance particuliere, que pour engendrer noise, ennuyez de la durée de la concorde & paix du Royaume Que n'a il esté tenté & inuenté pour exciter des mescontentemens, former des partialitez, & factions, émouuoir les peuples à sedition par diuers moyens, par gens impatiens, de veoir croistre le Roy, avec son aage en iugement, courage, & en la cognoissance du bien, & du mal qu'il reçoit de ses seruiteurs, & subiects: Tels offices ont esté faicts curieusement, pour en trauerlant la conduite des affaires publiques, establir celles des particuliers: Et tout ainsi que i'ay trauaillé sincerement à maintenir la paix du Royaume, en faisant exactement obseruer, & executer lesdits Edicts: Je n'ay pas esté moins soigneuse & diligente à conseruer les amitez des alliez, & confederez de la Couronne, tellement que i'en ay plustost accru, que diminué le nombre: Veritablement i'y preferé ladite Alliance d'Espagne à celle de
Sauoye

Sauoye, Mais ie n'ay rien faict en cela que le feu
Roy mon seigneur, n'eust faict lors que Dom
Pedro de Toledo vint vers luy de la part du Roy
d'Espagne, s'il luy en eust faict l'ouuerture, com-
me ils'y attendoit. Depuis ie m'y suis conduite
entierement par l'aduis de feu mon Cousin le
Comte de Soissons qui estoit auprez du Roy,
quant la premiere proposition en fut faite, la-
quelle vous fust communiquée par moy, & par
ledit Comte, à vostre retour de Guyenne, &
fust deslors approuuée de vous, comme de luy,
& de tous ceux qui en eurent cognoissance,
comme vtile, bien proportionnée, à l'age, & à
la grandeur du Roy: Et puis affermer n'auoir e-
sté poussee à ceste preference par défaut d'affec-
tion, & bonne volonté enuers mon frere le
Duc de Sauoye, & sa maison, ny à autres fins,
que de la consideration du merite d'une telle
alliance, & de l'affermissement de la paix entre
ces deux Roys, vtile à la Chrestienté, & plus
nécessaire à l'Etat present des affaires du Roy-
aume, qu'en autre saison, Dequoy ledit Duc
de Bouillon fust chargé, d'esclaircir le Roy de
la grande Bretagne, où le Roy, & moy l'en-
uoyasmes exprés, pour faire cet office, qui fut
rendu semblable en meisme temps aux autres
Princes, Potentats, & alliez de ceste Couron-
ne, qui ont tous montré les auoir receus en
bonne part: le diray dauantage, que les motifs
du Conseil qui en fut lors pris, n'ont esté moins
considerables pour ledit Duc de Sauoye, & ses
Estats, que pour la France, Vous en scauez les

raisons comme moy. Mais tels blasment à present lesdits Conseils, & Mariages, qui ne feroient, peut estre, conscience de se preualoir au desaduantage du Roy, mondit sieur & fils, & du repos de la France, d'une mauuaise intelligence entre ces deux Roys. C'est pourquoy ils vsent encores à present de toutes sortes d'artifices, & de diligences pour en retarder l'exécution, en intention de les rompre du tout, s'ils le peuuent faire. Mais j'espère que nous scaurons bien y remedier, avec l'ayde de Dieu, qui favorisera, s'il luy plaist, nos sinceres intentions, qui n'ont autre but que de procurer le bien du Royaume, avec le contentement particulier du Roy, & le bien de ma fille aisnee, tout ainsi que j'espère faire pour la seconde, du costé d'Angleterre, de quoy vous ne faictes mention par vostre dite lettre, cela nuirait aussi au dessein de ceux qui vous conseillent: j'espère de sortir amiablement, à l'honneur du Roy, & au bien, & contentement de ses subiects, des differents de Navarre, mesmes deuant que nous passions outre ausdits mariages, sinon, j'auray tel soin de conseruer, en ceste occasion, les droicts, les limites, & la reputation de la France, que ceux qui nous accusent de n'en auoir le soin que j'en deuois auoir, auront occasion de s'en dédire, & de retrancher de leurs plaintes, celles qu'ils fondent sur ce subiect: Mais quoy? Ils voudroyent desia nous voir aux prises, & aux armes avec le Roy d'Espagne, pour s'en preualoir en leurs imaginations: Tant

s'en faut aussi que l'on aye sujet de se plaindre de l'assistance du Roy, mondit sieur, & fils, & de la mienne, aux affaires de Montferat, que j'attendois les loüanges, & des remerciemens du soin que j'en ay eu. Car il est notoire à tous, si mon Nepueu le Cardinal Duc de Mantouë (que j'affectionne beaucoup, avec toute sa maison, à cause de son affection enuers la France, & de nostre proximité.) iouist a present de quelque allegement en ses affaires, il doit estre attribué au secours, & aux offices de vraye amitié, que le Roy, mondit sieur, & fils, & moy, luy auons departis en ceste necessité, lesquels nous aurons rousions à plaisir de luy continuer, autant que les affaires du Royaume nous le permettront. Car ie suis obligée, comme vous scauez de preferer celle-cy à toutes autres, dequoy si i'vsois autrement, vous me blasmeriez, avec raison le premier: Comme ie ne puis faire assez ceux qui reprennent, ou condamnent les deuoirs qui ont esté faicts pour faire considerer, & poiser, comme il conuient, les raisons qui importent à la France, sur la nouuelle poursuite des Venitiens, pour le renouvellement de leur alliance, avec les Lignes Grises, dignement représentées par l'Ambassadeur du Roy, qui reside ausdites Lignes, deuant que d'y engager le nom, & la reputation du Roy: Considererez ie vous prie, à quels termes de mesconnoissance enuers le bien public du Royaume, les passions priuées, desuoient ceux qui blâment nostre conduite, en ce faict: car ils veulent que passe par dessus

12
toutes sortes de raisons, & considerations, quel-
ques i^mportantes qu'elles soyent au Roy, & au
Royaume, pour suiure leurs opinions, soit pour
flatter ladite republique, ou pour auoir suiet
de fomentier & accroistre dauantage la desiance
desdites alliances d'Espagne, comme si la seule
consideration des interets d'Espagne, nous re-
tenoit de contenter ladite republique, & fauo-
riser ladite alliance, chose qui est tres-esloignee
de la verité. Mais il ne faut que lire les dépes-
ches de nostre Ambassadeur, & se ressouuenir
des accidents suruenus à ceste nation grisonne,
apres la premiere ligue de Venise, pour con-
damner la plaincte que l'on faict de ma con-
duicte, en cecy. Ladite premiere ligue fust ve-
ritablement fauorisee par le feu Roy. Mais il
s'en repentit assez quant il vit qu'elle preiudi-
cioit à la sienne (qui couste cher à la France,) &
auoit plongé ceste nation en des confusions &
calamitez tres-grandes, dont la memoire leur
est tous les iours rafraischie quand ils iettent les
yeux sur le fort de Fuentes, basty à la frontiere
de leur pays, apres que ladite ligue de Venise
fust faicte; & à l'occasion d'icelle, & neant-
moins comme le Roy, mondit sieur & fils, &
moy, desirons grandement fauoriser ladite re-
publique, à l'imitation du feu Roy, & de ses
predecesseurs. Nous auons ordonné que les ca-
pitulations de leur premiere alliance, soyent
veus pour retrancher & reformer celles qui
peuuent nuire & affoiblir celle de la France; de-
quoy l'Ambassadeur de la Seigneurie doit con-

ferer avec ceux du Conseil du Roy. Ceste procedure ne peut estre iustement reprise & blasme, Mon Nepueu, que par ceux qui cherchent querelle, & preferent leurs passions au bien de la France. Mais qu'y a-il que l'on n'inuente, & que l'on ne publie pour descrire ma Regence, & les seruiteurs du Roy qui trauaillent iournellement aupres de moy, pour s'acquitter fidellement de leurs charges. Nous voyons clairement que l'on s'adresse à eux, pour en espargnant mon nom, en papier, faire tomber sur moy, par effect, les reproches, dont l'on les charge. Tant y a que personne ne peut nier que le Royaume ne iouysse à present d'une felicité plus digne d'admiration, & partant d'honneur, & de loüange pour ceux qui seruent, que d'aucun reproche: Ce sont gens vieilliss dedans les affaires publiques, & les charges qu'ils exercent: Si le soin qu'ils y employent, avec beaucoup de fidelité, d'enuie, & de labeur, doit estre baptrié du tiltre d'ambition, & conuoitise de gouverner, l'aduoué qu'ils sont coupables: En tout cas, mon Nepueu, les fautes sont personnelles, si aucun d'eux s'est tant oublié que de manquer au deuoir de sa charge, & mesmes à vous seruir, i'entens plustost le condamner que de l'excuser: Mais ie scay qu'ils en ont vscé autrement, & que vous auez plus de sujet de vous louer de l'honneur qu'ils vous ont tousiours rendu, & du seruice qu'ils vous ont fait aupres du Roy, & de moy, & au public, que vous n'auiez de les tenir pour tels que vous les

dépeignez, & neantmoins ie veux me plaindre à vous, de vous estre par trop desfié de vostre creance, & puissance enuers moy, & de mon affection enuers vous, d'auoir laissé passer tant de temps depuis ma Regence, sans m'auoir descouuert leurs deportemens, si vous les auez recogneus preiudiciables au public. Car i'y eusse pourueu par vostre bon aduis, & me promets tant de la reuerance qu'ils portent à mes volontez, & à vostre personne, que seulement pour nous complaire, & se descharger du fardeau qu'ils supportent, & contenter le public, ils auroyent librement eux-mesmes remis leurs charges en ma disposition, au premier signe qu'ils en eussent receu de moy, comme ils m'ont particulièrement & publiquement déclaré sur vostre dite plainte, qu'ils sont encores prests à faire à la premiere semonce qui leur en sera faicte de ma part: Pareillement ma condition seroit bien dure, & mon peuuoir restreint, s'il ne m'estoit loisible de remunerer de biens, & d'honneur, (sans faire prejudice au Roy, n'y au public) vne longue seruitude accompagnée d'une fidelité esprouuée?

Voudriez vous estre reduit à tels termes pour ceux qui vous seruent? Vous nous auez bien faict cognoistre que vos pretentions, & intentions sont bien esloignées de ceste restriction, laquelle aussi doit estre iugée de vous peu equitable pour les autres: Semblablement ie recognois que le Roy eust esté mieux seruy, si nous eussions reiglé vu Conseil pour les affaires

13
d'Estat, composé seulement de vous, & des autres Princes, avec les Officiers de la Couronne. Mais qui a plus désiré cela, & qui y a plus travaillé que moy, à quoy véritablement j'ay esté mal assistée de tous, Et toutesfois maintenant vous vous seruez de ce sujet, & de la confusion dudit Conseil, pour descrire les seruiteurs du Roy, & le gouvernement: Seroit-ce pas vn grand honneur, & aduantage, & vne pareille descharge pour ceux qui les manient, a cause de leurs Offices, si les despesches à mesure qu'elles sont receuës, & que les réponses sont ordonnées, & deslées, elles estoient leuës en vn Conseil reiglé, & composé de personnes de telle qualité, Pour le moins leur labeur, & leur diligence, avec leur suffisance; seroyent mieux cogneues, & toutes choses seroyent véritablement mieux ordonnées: Vous deuez vous souuenir, que voyant que ie ne pouuois paruenir à la reduction, & reformation dudit Conseil, par faute d'assistance, j'auoys trouué bon que ceux qui ont les charges des despesches, & des finances, vous veüssent par fois en vostre maison, & receüssent vos aduis sur icelles, pour les me représenter pour vous resmoigner l'estime que ie fais de vous, & ma confiance en toutes choses: Mais vous vous estes plustost lassé de cet ordre que vous n'avez fait paroistre d'en désirer la continuation: Outre cela, on a voulu vous faire trouuer mauuaise mon entrée au Conseil des affaires des Prouinces, comme si ma presenco débuoit y estre incompatible avec la vostre, &

en quelque sorte retrancher le respect qui vous
est deub, chose veritablement qui seroit adue-
nuë contre mon intention; I'aduoue bien d'e-
stre tresialouse du bien des affaires du Roy Mais
de qui dois-je esperer d'estre mieux secondée en
cela que de vous, estant ce que vous estes? Or
mon Nepueu, pour bien faire au public, vous
deuiez demeurer aupres du Roy, & de moy, vo-
stre qualité de premier Prince du sang vous eust
doné toute creance & autorité pour estre ouy,
& creu, sans autre assistance que de la iustice, &
de la verité de vostre remonstrance. Vous eus-
siez cogneu & esprouué par vrais effects, que
mon affection enuers le public surmonté de
beauconp celle que ie rends aux particuliers de
toutes qualitez. Vous m'eussiez trouuée tres-
desireuse de la conuocation, & du remède des-
dicts Estats generaux pour estre tenus en la for-
me ancienne, en laquelle chacun trouuerra la
seureté & liberté qu'il conuient, pour y com-
paroistre, & y bien seruir le Roy, & le public,
souz la protection de son autorité souueraine,
& de sa iustice, telle qu'elle doit estre attédue, &
desirée de tous. Mais prenez garde que souz
pretexte de la demande, quel'on vous faict faire
en termes generaux de rendre lesdits Estats,
seurs & libres, l'on ne minute & proiecte desia
des difficultez pour eluder & aneantir ladite as-
semblée, & en auoir le fruit deuant sa nais-
sance au preiudice du public, contre vostre at-
tente, & vostre proposition. Ceux qui auroiēt
ce dessein estimeroient neantmoins de n'auoir
peu ga-

peu gagné, en faueur de leur party, d'auoir par anticipation semé dedans les esprits des homes, l'esperance de ladite assemblée, fondée sur ladite reformation, quant bien elle deuroit apres tourner en fumée, pour renuerser sur les autres, vn mescontentement general de l'interruption d'icelle, duquels ils seroient neantmoins seuls cause : Ce que vous m'auiez mandé auoir esté deliberé icy, d'arrester la personne dudit Duc de Bouillon, me donne ce soupçon. Car comme tel aduis est imaginaire, faulx, & plein d'artifice, procedant d'une profonde malice, ie ne puis que ie n'apprehende dès à present la rencontre à l'aduenir, de semblables ruzes & inuentions, mesmes lors qu'il faudra donner entree à ladite assemblée d'Estats, Partant vous y aduiserez, & y pouruoierez de bonne heure. Mais ie ne puis bonnement croire que mon Cousin le Duc de Longueuille ayt rapporté que ie luy aye refusé d'ailer en son gouuernement, bien l'auoy-ie moy-mesme prié d'attendre quelques iours à partir, pour resoudre avec luy les Estats des garnisons, & fortifications des places dudit pays, en la forme accoustumee, à quoy il eust trouué à redire, & à se plaindre, si i'y eusse touché sans luy. De sorte que i'ay bien plus grande & iuste cause de me douloir de luy, de quoy m'ayant, après diuerses instances, fait asseurer qu'il me donneroit ce delay, il s'est destrobé de nous à heure indeuë, pour tesmoigner à tout le monde la mesfiance qu'il a de ma foy, laquelle n'a toutesfois encore defaillly à

personne viuante, graces à Dieu : Ce proceder
 fut cause, que m'ayant esté rapporté que le Duc
 de Vendosme auoit longuement conseré avec
 ledit Duc de Longueuille, le mesme iour de son
 depart, ioinct les diuers, & frequents aduis qui
 m'estoyent donnez, des preparatifs qu'il fai-
 soit, pour, à son imitation, se desrober, le pris
 Conseil (meuë du soin que ie veux auoir de sa
 fortune, & de sa reputation, pour le respect
 que ie dois, & veux rendre toute ma vie à la
 memoire du feu Roy, mondit Seignent) de le
 faire retenir en sa chambre, dedans le Louure,
 non à autre fin, que pour le garantir d'une de-
 sobeyllance, en laquelle ie le voyois prest à se
 precipiter, ce qu'il a mal recogneu, & verita-
 blement sa faute, & mescognoissance en cela,
 est plus blasmable en luy qu'en vn autre: Vous
 en scauez les raisons, que vous auez quelque-
 fois employées pour l'accuser, & le reprendre:
 Mais c'estoit lors que ledit Duc auoit recours à
 d'autres qu'à vous, pour estre supporté en ses
 ieunelles: Quant à la Citadelle de Bourg, com-
 me elle auoit esté bastie par feu Monsieur de
 Sauoye, exprés pour nuire à la France, elle a
 esté razée depuis, pour en assseurer la conserua-
 tion, L'argent qui a esté employé pour recom-
 penser les seruices, & les merites du sieur de
 Boisse, qui y commandoit, n'incommodera
 point le Roy, mais plustost soulagera ses finan-
 ces: Car ce n'est qu'une aduance qui sera bien-
 tost recompensée par l'Espargne, de la garnison
 qui y seruoit, laquelle montoit par annee be-

aucoup, de façon que ce Conseil qui a esté ap-
prouué de plusieurs, sera vtile à la France: Tout
ainsi que l'argent employé pour retirer le Cha-
steau d'Amboise, des mains de celuy qui le gar-
doit, le sera aux villes assises sur la Riuere de
Loire, qui ont receu, avec le pays, de grandes
incommoditez durant la guerre, par la garni-
son qui y estoit, C'a esté doncques pour mettre
ledit pays en seureté, tirer de craincte les habi-
tans d'iceluy, que ladite recompense a esté don-
nee: Mon Nepueu, il est facile de descrire les
actions de ceux qui manient les affaires publi-
ques, le nombre des mal-contens, & enuieux
du bien d'autrui est grand, le desir de ceux qui
s'ennuyent du repos n'est pas moindre: Et com-
bien que depuis le trespas du feu Roy i'aye fa-
uorisé l'ordre Ecclesiastique, celuy de la No-
blesse, & faict soulager le peuple tant qu'il m'a
esté possible, Toutesfois il semble, par vostre
dite lettre, que vous pretendez leur faire croire
qu'ils ont esté, & sont mal traitez, Si contre
mon esperance, & la raison, aucuns d'eux se
laissent aller à telles inductions, & persuasions,
ils éprouueront bien tost après par experience,
& par effects, qu'ils auront empiré leur condi-
tion: I'ay en toutes choses suiuy les traces du
feu Roy, mondit Seigneur, en leur endroict,
pour leur bien faire: I'ay distribué des graces
parmy les deux premiers Estats, avec soin & iu-
gement, bien marrie de ne les auoir peu trai-
cter mieux. Tant ya que les gens d'Eglise ont
exercé leurs fonctions, & iouy de leurs benefi-

ces en toute liberté & seureté. Plus grand nombre de Gentils hommes de qualité, dedans les Prouinces, ont esté gratifiez & fauorisez par moy, que du temps du feu Roy: Plus de compagnies de gens d'armes entretenues: Quant à la vente & charté des offices, & des charges de la maison du Roy, & des Prouinces, elle n'a esté introduitte de mon temps, ie recognois & ressentis les maux qui en procedent. C'est pourquoy i'ay recherché & tenté les moyens de retrancher & faire cesser la cause principale deditz excez, Aucunes compagnies souveraines s'y sont opposees, qui sont d'ailleurs plaines d'affection, & de zele au bien public; Leurs raisons qui ont esté balancées au poids de l'interest particulier, ont pour ceste fois, & en ceste occasion, esté approuuées, non de ma volonté, mais par nécessité. I'espere que nous pouruoirons à ce desordre, qui n'est des moins dommageables à l'estat, par l'aduis, & avec l'ayde deditz Estats generaux: Je ne diray rien des autres, car ie n'en ay cognoissance, que par la plaincte generale que vous en faictes: Mais ie scay bien que plus de personnes de tous estats ont beaucoup plus de subiect de se louer de leur condition presente, que ne voudroyent ceux qui les veulent rendre mal contens par dessein, & par force: Plusieurs se lamentent & font bruiet de certaines commissions extra-ordinaires, & des impositions du sel, qui scauent bien que lesdites impositions ont esté moderées depuis ma Regence, & la plus grande partie des-

dites commissions , reuoquees : Ils forment
telles plainctes , & les iettent aux yeux d'un
chacun , plus pour les esbloüir & acquerir cre-
ance , que pour soin & intention qu'ils ayent
de les en soulager. C'est pour fortifier leurs ca-
bales , & toutesfois i'espere que les plus sages se
garderont bien de chopper contre ceste pierre,
la memoire des playes , & des miseres & cala-
mitez passees , prouenues des guerres ciuiles, est
encores trop fraische , & viue dedans les cœurs,
& les biens d'un chacun : En tout cas, ie ne dou-
te point que ceux qui se laisseront surprendre
aux esperances d'une pretendue reformation,
& d'un soulagement public , par telles voyes,
ne s'en repentent bien tost. Les Ecclesiastiques
cognoistront, par la suite de semblables amor-
ces , qu'elles ne sont proposees que pour ad-
uancer la ruyne , & desolation de leur ordre , a-
uec la Religion Catholique : Mais surquoy est
fondée vostre plaincte , qui regarde la Sorbon-
ne. L'on a semé à poste dedans ce College vene-
rable, la discorde, pour former vn schisme, non
seulement en ceste compagnie, mais en toute
l'Eglise Catholique de ce Royaume : I'y ay op-
posé , & employé l'autorité du Roy , & la mié-
ne, non pour nourrir leur diuision , mais par
bonnes temonstrances, & exhortations, la com-
poser, & en empescher le cours , quia-il à re-
dire , & reprendre en ceste procedure , autres
ne peuuent la trouuer mauuaise , que ceux qui
pretendent profiter de ladite diuision , comme
trop souuent ils ont fait de celles qu'ils ont in-

roduites , & espandues par tout , où ils ont
esté escoutez , Au contraire d'eux : I'ay soigneu-
sement combattu , & trauaillé en tous lieux ,
pour composer lesdites diuisions , à mesure
qu'elles sont venuës à ma cognoissance , & scay
que ceux qui nous accusent de les auoir entre-
tenuës , sont eux qui les ont formées , & en
forgent encores de nouvelles iournellement ,
autant parmy les subiects du Roy , qui font pro-
fession de la Religion pretendue reformée (que
l'on m'a iniustement attribuées) qu'à l'endroit
des Catholiques , sans en cela espargner les
Princes , & les grands du Royaume , en leurs
propres maisons , & familles , dequoy vous , &
ceux qui vous assistent , ne demeurerez long
temps sans vous ressentir vous mesmes , & les
autres aussi. Mais ce sera après que vous ferez
si auant engagez en leurs conseils , que vous ne
pourrez plus vous en retirer , & desuelopper ,
qu'à leur mercy , & discretiō. Si ie pouuois vous
représenter par vne lettre les recorts , & pres-
ges sur cela du feu Roy, mondit Seigneur, ie les
vous exposerois volontiers , tant i'apprehende
pour vous , & les autres Princes qui sont près de
vous , & pour le public , les disgraces , & mal-
heurs qui sont inéuitables en la poursuite
du dessein , auquel l'on vous a embarqué.
Vous protestez, MON NEPVEV, de vouloir
proceder en celle de la susdite reformation ,
par moyens legitimes , & non par armes : Je
veux croire vostre intention estre telle , mais
prenez garde que l'on ne vous engage à pis fai-

re, & sur tout à bastir vn party dedans le Roy-
aume, qui sans la permission de l'autorité sou-
ueraine ne peut estre legitime, si faire cela n'est
faire la guerre ouuertement, C'est forcer le Roy
de s'y opposer par toutes voyes, C'est sonner la
trompette pour les perturbateurs du repos pu-
blic, & introduire, & commencer vne espee-
ce de guerre, pire que celles des armes, & partant
au lieu de bien faire à l'Estat, en aduancer la de-
solation: l'espere tant de loyauté de ceste gene-
reuse Noblesse, qui a tousiours exposé, & res-
pandu liberalement son sang, pour defendre la
personne de son Roy, & son autorité souue-
raïne, qu'elle preseruera fidèlement en ce de-
voir, nonobstant les artifices, & desguisemens
dont l'on vse pour la seduire: le nourriray, & es-
leueray aussi mon fils en la recognoissance, & re-
muneration du merite & des seruices d'icelle, à
l'imitation du feu Roy, son pere, lequel assisté
de ladite Noblesse, coniointe à la faueur du
Ciel, & secondée de sa propre vertu, a sauué le
vaisseau de la France, du naufrage qu'il a couru
par l'entresuite des guerres ciuilles. Les villes
ne detesteront, n'y fuiront pas moins les au-
theurs des causes & partialitez qui engendre-
ront semblables effects: Car ils ne peuuent estre
si couuerts en leurs desseins publiez, ou priuez,
que les Citoyens & habitans desdites villes,
soient pour s'y laisser circonuenir. C'est pour-
quoy ie leur ay par aduance ordonné de se bien
garder & de ne donner entrée en leursdictes
villes à personne puissante assez pour s'en em-

pater, & leur donner la loy, Car le Roy, mondit
 sieur, & fils, & moy, ne pretendons pouruoir à
 leur seureté, que par l'entiere confiance & as-
 seurance que nous auons de leur loyauté. La
 charge que i'ay m'a obligé à vser de ceste pre-
 caution contre les mouuemens qui fretille-
 nt. Laquelle ie m'assure, Mon Nepueu, que vous
 approuuerez, car elle est faicte non pour nuire à
 personne, mais pour garantir d'iniure & d'op-
 pression, ceux ausquels ie dois protection: Mais
 pourquoy me recommandez vous par vostre
 dite lettre, le retour du Cheualier de Vendosme
 auprès du Roy, puisque c'est chose que vous
 sçauiez que i'ay ordonné, il y a plusieurs mois, il
 n'a esté retardé que pour le rendre porteur de
 l'obediance, qu'il faut que le Roy rende à no-
 stre S. Pere le Pape, & au saint siege deüie à cau-
 se de son aduenement à la Couronne: Preten-
 dez vous quelque aduantage de son retour, &
 de sa presence auprès du Roy, ou si c'est par pu-
 re charité, & affection que vous faictes ceste
 instance. Vous sçauiez que ie scay quels ont esté,
 & iusques ou peuuent encores s'estendre les co-
 seils & proiects des principaux autheurs de nos
 diuisions, Je ne m'expliqueray pas plus auant, Il
 suffit que i'aye recogneu & éprouué la portée de
 leur conscience. Or mon Nepueu, pour finir &
 conclurre la presente, Je vous représenteray de
 nouveau, par forme de repetition, que pour ve-
 ritablement faire cesser les desordres & excez,
 que vous pretendez auoir cours en ce Royau-
 me, Il faut faire tout le contraire de ce que
 vous

vous faites. Premièrement vous ne deuez vous tenir esloigné du Roy , n'y de moy , comme vous faites , ains nous forrifier au plustost de vostre assistance , avec laquelle nous pouuons facilement pourueoir à toutes choses necessaires pour le bien de tous : Secondement , Vous ne deuez autoriser de vostre nom , vne diuision entre les Princes , Seigneurs , & maisons Catholiques du Royaume , laquelle a esté indubitablement forgée par tels , qui peut estre n'esperent pas moins en profiter quelque iour , à vostre propre dommage qu'au mien : Finablement , vous deuez vous abstenir de blasmer publicquement , comme vous faites , le gouuernement des affaires , & les Officiers qui y seruent , mesmes deuant que de vous en estre adressé à moy en particulier : Mais chacun ne cognoist que trop clairement aussi , que vous vous adressez à moy plustost qu'à eux , Pareillement vous , ne deuez permettre estre dressé des partis dedans l'Estat , y estre semé des schismes , diuisions , & detractions , le gouuernement descrié , Que l'on se plaigne des graces que i'ay faites , qui sont appellées maintenant prodigalitez , par ceux qui en ont recueilly , & employé le fruit à leur aduantage , estre donné attainte à la paix publique , sagement , & heureusement maintenue depuis quatre ans , contre les diuers assauts & artifices employez pour la renuerser , exciter & emouuoir le Clergé , & la Noblesse , avec les habitans des villes , & le peuple , mesmes les compagnies souueraines , & tous les officiers à

mescontentement. Vouloir exprés retarder les
 mariages contractez, pour apres les renuerser a-
 uec la paix de la Chrestienté, après auoir esté a-
 prouuez par vous, & en auoir vous mesmes si-
 gné les contracts, n'y permettre aussi en estre dō-
 né ialousie aux suiects du Roy, & à nos voisins,
 & faire celer exprés à mesme fin le mariage qui
 se traicte en Angleterre: Bref, interpreter à mal
 tout ce qui a esté faict, & qui a neantmoins heu-
 reusement succédé au bien, & aduantage des
 affaires du Roy, dedans, & dehors le Royaume,
 depuis le trespas du feu Roy, mondit seigneur:
 Car faire toutes ces choses, & les accompagner
 encores de toutes sortes de pratiques, enrool-
 lemens de gens de guerre, & recherche d'e-
 strangers, Il faut que ie vous die, avec la mesme
 liberté, que vous m'auiez escript, & adressé vo-
 stre dite lettre, & l'auiez depuis semée, & res-
 pandüe par tout, que ce n'est le droict chemin
 qu'il faut tenir, pour véritablement reformer
 l'Estat par moyens legitimes comme vous le
 protestez, Et demander encores, en suite de
 cela, vne assemblée conditionnée de seureté, &
 de liberté, c'est a dire, à la mode, & au goust
 de ceux qui vous donnent tels conseils, qui peut
 estre, ont des à present pour but (sous pretexte
 de ceste pretendue seureté, & liberté) d'en ren-
 uerser, & empescher du tout l'effect, comme ie
 vous ay cy deuant dit, par où il semble que l'on
 n'ait autre visée que d'esblouyr les yeux d'un
 chacun, par la proposition de ladite assemblée,
 pour faire croire que ie l'apprehende avec ceux

qui seruent le Roy auprès de moy , & neant-
 moins nous la desirons plus que tous , & espere
 que nous en profiterons aussi pour le bien , & le
 seruice du Roy , & du Royaume , plus que tous :
 Au moyen dequoy , mon Nepueu , si vous vou-
 lez que le Roy , & moy , & tous ses bons serui-
 reurs , & subiects , croyons que vous aspirez ve-
 ritablement à la susdite reformation , par bons ,
 & legitimes moyens , & en intention de bien fai-
 re , Changez , ie vous prie , vostre conduite , &
 procedure , car indubitablement celle que vous
 auez choisie , auancera , & augmentera plustost la
 confusion , & les desordres qu'elle ne les retran-
 chera , à la desolation generale du Royaume , &
 partant à vostre desauantage , comme au no-
 stre , & reuez nous trouuer avec ceux qui sont
 conroincts avec vous en ce proiect , Vous , & eux
 y serez receus avec honneur , & confiance , fai-
 sans cesser par effect toutes sortes de menees &
 pratiques qui ont cours par les Prouinces du
 Royaume , & au dehors , que personne n'entre
 en doute des armes du Roy . Car elles seront
 employees à la deffence commune & indiffe-
 rente de tous . Auancons en diligence , & atten-
 dons avec patience , le succes de ladicte assem-
 blée generale des Estats du Royaume , s'il y a du
 mal maniemment des affaires publiques , & de
 l'excez de pouuoir en iceux qui les manient
 (jaçoit que ie ne me sois aperçeue qu'il en ayt
 esté abusé) i'y remedierai avec vous . Partant ie
 vous conuies de rechef , & coniure par l'interest
 que vous auez au bien de ce Royaume , de vous

rendre auprès du Roi au plustost & deuant que les maux (qu'engendre vostre esloignement, & le chemin que vous auez ouuert) prennent plus profonde racine, vous y trouuerez la place qui vous est deüe, elle vous est reseruee entiere avec soing & affection, par le Roy, mondit sieur, & fils, comme par moy, Il est graces à Dieu doué d'un esprit & naturel plein de benignité & de vigueur, Il est nourry & esleué en la crainte de Dieu, & à discerner & regnoistre ceux qui l'affectionnent à la proportion de leurs qualitez, merites & seruices, Je vous promets qu'il vous cherira comme vostre sang, veut qu'il face, & ie remedieray facilement avec vous aux pretendues inegalitez & differences que vous dictes apparoir en ces deportemens: En fin ie continueray à contribuer de mon costé les offices & enseignemens qui dépendent de moy, tant enuers luy, qu'ailleurs, pour vous donner tout suiet de vous louer de ma bien veillance, & à tous les autres, de ma conduite en toutes choses, A tant ie prie Dieu, mon Nepueu, qu'il vous ayt en sa sainte & digne garde. Escrit à Paris, le vingt-septiesme iour de Feburier 1614.

Vostre plus affectionnée Tante

MARIE

